

PILEMONENYA

POLOME PEPAP YAO

PYASAKAMAIYAMO DOKO

Pii Wambao Leamo Dokoo

¹Namba Polo, Jisasa Kraisanya kalai pyakamaipusa anjetae palelyo dokopa, naimanya Kristene kaiminingi Timotiapa, nambame pepa dake pyao, nambanya mona setenge, kalai tole pingi Pilemone embapi, ²naimanya mona setenge Apiapi, naima-pipa yanda apata pingi Akipusapi, embanya andaka Kristene kambu pyatae petengema dupapi, dutupanya peekelyambano. ³Naimanya Takange Gotepa Kamongo Jisasa Kraisapanya kondo kaenge dokopa, mona yaepenye dokopa, dolapo nyakama-kisa sipya laka lao masilyambano.

Pilemonenya Mana Epe Dupanya Leamo Dokoo

⁴⁻⁵Embame Kamongo Jisasa tungi pyatala, endakali Gotenya latae dupa pitaka auu kaeyao kalyeno lapae dokonambame silyo. Tenge dokonya, nambame koteaka lao loma silyo dokonya, emba kame sala naeyao, nambanya Gote dokoyaka pilyino lenge. ⁶Naimame Jisasa tungi pilyamano dokonambame apata tungi pingiaka. Embapi naimapi Jisasa tungipyao katao, Jisasa Kraisa-kisa nisepae nyilyamano dupa pitaka embame auu pyoo masetale lao nambame loma silyo. ⁷Kaimii, embame endakali Gotenya latae dupa auu kaeyapala, dupanya mona auu pisakamaingi dokome naima kyetodimupa, longo lao Gote yaka pilyino lelyamano.

Onesimusa Lanyepengena Leamo Dokoo

⁸⁻⁹Namba Polo, akali ang i doko, Jisasa Kraisanya kalai pyakamaipusa indupa anjetae palelyo dokome dapa langilyo:

Namba Kraisa-kisa katao, paka nakaeyao embame pipenge mende pipina lao kyeto joo langipuliaka doko, nambame emba auu kaenge dokonya, embame kalai mende pyakatale lao pata-pata lao langitoo. ¹⁰Namba anjetae paliu, nambanya wane Onesimus baa wai pii epe doko lamaipupa, baame Jisasa tungi pyapya dokome, baa nambanya ikinungi etete jipy. Dopana, embame baa auu pyoo lanyakatale lao langilyo.[†] ¹¹⁻¹²Wamba baame emba nisala naeyaka doko, indupa baame embapa, nambapa lapota nisepenge kalyamo.[†] Onesimus baa nambanya monanya nee andake pimupa, indupa emba katapi dokonya pilyina lelyo. ¹³Nambame wai pii epe doko lamaipusa, namba anjetae palelyo da-kenya, baame emba alo pyoo namba yakinala naeyao nisina, namba-pipa katambana kaeyapya laka lao masilyo. ¹⁴Dopaka doko, embame yakana lao masala naeyateno nakandenya, baame dopa napypy laka lao masilyo. Embame mende pitoana lao maseteno doko, nambame tuu lamusa pilyona lao masala naenya, emba tangenya auu kaengeme pilyona lao masoo pyaale lao lelyo. ¹⁵Onesimusame emba yakinatala, gii kuki mendatupa waka katea. Dopa pia dokome, embame baa pilyoo lanyetenopa, nyakamba tole etete katatambinopa lao pia. ¹⁶Indupa Onesimus baa kendemane nakalyamo. Baa nalimbanya Kristene kaiminingi mona setenge mende kalyamo. Baa nambanya monanya nee petae kalyamoaka doko, baa embanya kendemane dokonya iki daa, Kamongo tungi pingi dokonya-kaita, baa embanya Kristene kaiminingi mendeakana lao masetala, embame eteteaka nee kaeyapenge.

¹⁷Dopana, nalimbame Gotenya kalai doko tole pyaka-maingina lao maseteno doko, embame namba lanyipili pyoaka Onesimus lanyepe. ¹⁸Baame mendita mendenya emba koeyasoapi, embanya yanu mende baa-kisa soapi pia-kandeno doko, baanya kenge dokonya kaeyapala, dupa

[†] ¹⁰ Wamba Onesimus doko Pilemonenya kendemane kalai pyaka-maiyoo katenge-pyaa. Dopa pingiaka doko, gii mendepa baa Pilemone yakinatala paka pea-pyaa. Gii dosa kendemane mendeme baanya akali andake doko yakinatala paka patelyamopa, kutao nyepala baa pyao indyepala kumasetamopa, baa-kisa tenge naipatana lao loo pyapae singi-pyaa. Tenge dokonya, Polome Pilemone pii doko lamaiya-pyaa.

[†] ¹¹⁻¹² Kenge Onesimus dokonya tenge doko, Nisingi akali.

nambanya kenge dokonya setakape. ¹⁹Embanya yanu mende baa-kisa setamo doko, nambame tolasakatona lelyo pii doko namba Polome nambanya kingimi pepa pyao peekelyo. (Embame namba-kisa lete katenge nyiino doko, emba-kisa nambanya yanu joo silyamona lao lapuliaka doko, kaeyapala kaelyo.) ²⁰Dopana, kaimii, Kamongonya kenge dokonya embame nambanya kalai epe dupa pyakapi laka lao masilyo. Kamongonya kenge dokonya embame nambanya mona auu pisakapi laka lao masilyo.

²¹Pyakatale lao langilyo dupa embame pyoaka, waako mendatupa apata pyaapenona lao kyeto joo masetala, nambame embanya pepa dake pyao peekelyo. ²²Pii dake apata langilyo: Nyakamanya loma simi dupa Goteme sepala, nambame nyakama kanja ipupenye kaitini mende setakatana lao nee kaeyao malisoo kalyona, nambanya palipenye panda mende depa lakape.

Etao Las Leamo Doko

²³Jisasa Kraisanya kalai pyakamaimbanosa anjetae nambapa tole palelyambano Epapotasame emba auu pyoo katape lelyamo. ²⁴Namba-pipa kalai mendai pingi Makepi, Atisatakusapi, Demasapi, Lukupi dutupame emba auu pyoo katape lelyaminoaka.

²⁵Naimanya Kamongo Jisasa Kraisanya kondō kaengē doko nyakama-kisa sipyā laka lao masilyo.

Doko kinngi.

²³ Kol 1:7; 4:12 ²⁴ Ap 12:12,25; 13:13; 15:37-39; 19:29; 27:2;
Kol 4:10,14; 2 Tim 4:10-11